

# *yoyo*

skakutavi magazin za  
kulturu (ali) i zabavu

JUNI, 2018.



*Udruženje za jezik i kulturu Lingvisti  
Association for Language and Culture Linguists*

Izdavanje ovog časopisa omogućeno je finansijskom podrškom Australijske ambasade.



# NAŠ PRVI REDAKCIJSKI SASTANAK:

## Muhamed, Eldina, Nejra, Mustafa

Naučili smo nekoliko novih riječi. Jedna je od njih: redakcija. Sad znamo da je to tim ljudi (a i djeca su ljudi :) ) koji zajednički prave neke novine ili magazin. Mi smo redakcija.

Svaka redakcija, kao škola ili razred, ima članove i članice koji nešto rade. Glavni urednik ili glavna urednica, naučili smo, su kao učitelj ili učiteljica u odjeljenju, odgovorni za sve. I za super stvari, ali i za greške i propuste. To je naša Eldina. Lektor ili lektorica mora doooobro da poznaje gramatiku i pravopis i ispravlja greške: č ili č, sastavljeno ili rastavljeno pisanje, malo ili veliko slovo... Lektoricom smo na našem prvom redakcijskom sastanku proglašili Nejru S. poznatiju i kao Velika Nejra :). Tu su i novinari i urednici rubrika. Mustafa jako voli crtanje, pa je postao likovni urednik, a Muhamed koji baš ne voli da ga se fotografije, već voli stajati iza kamere odlučio je da će biti dežurni fotograf redakcije. I eto ga, tako smo mi to smislili uz hamburgere i sladoled, a Nađa koja je zadužena da nam radi takozvani prelom štampe, odnosno da sve naše tekstove i fotografije upakuje u novinu, magazin, časopis, napravila je i plakat kojim pozivamo i druge da nam se pridruže!



I da znate da jesu – i evo ga, prvi broj Yo-Yo-a, je u vašim rukama: osmišljen na sladoledu, nastao u raznim prostorima, od učionice na četvrtom spratu, do kina i muzeja!





## GLEDALI SMO FILM „POKLON“:

Muhamed, Eldin, Samuel, Mustafa,  
Muhamed S., Medin, Nejra H.

Priča ide ovako: dječak sjedi ispred monitora i igra igricu. Spustio je roletne da ga sunce ne ometa u igri. Igra i ne vidi ništa drugo osim te igrice. Mogao bi imati oko dvanaest godina. Ili deset. Nije ni važno. Inače se zove Jack, a mi smo mu dali ime Pašo. U nekom trenutku, u stan ulazi dječakova mama. Pozdravlja ga, spušta kutiju na sto, diže roletne i onda zaposleno odlazi na sprat jer joj zvoni mobitel – zovu je sa posla. Usput dobacuje sinu da otvorи kutiju. On je prvo ne stiže otvoriti, jer napeto je u igrici, a onda se zainteresuje i kako obraduje kada iz kutije svoju glavu promoli – psić! Na tren dječak ostavlja igricu i nasmije se. Čini nam se da je radostan što je dobio ljubimca. Ali... Samo nam se čini! Odjednom, dječak spazi da pas nema jednu šapicu i grubo ga odbaci, odmahuje rukom i nastavlja igricu. Ali pas se ne predaje – odlučan je da zaljubi dječaka u sebe! Skakuće, ganja lopticu, nespretno se zatvori u kutiju... Neodoljiv je i sladak i to dječak ipak primjećuje, mada se tome jako opire. Na kraju, dječak ipak ne može da odoli psiću - ostavlja igricu, ustaje i kreće ka vratima. No, dok ustaje, traži štakе. Kad se pridigne, vidimo da nema jedne noge. Pas i dječak zajedno se upute ka vratima, a dječak radosno dobaci mami da će se igrati vani. I: čiča miča gotova je priča. Pardon, slam slim, gotov je film!

Ovo što smo ovdje prepričali (ili se kaže prefiliali?) kratak je sadržaj petominutnog animiranog filma „Poklon“. Film je napravio reditelj Jacob Frey, a on je ujedno i autor scenarija. Gledali smo ga nekoliko puta i svaki put uživali, a onda smo radili i neke zadatke iz filma. Povezali smo priče sa filmom i filmove sa pričama i zamisljali kako bismo mi od nekih priča napravili kratke crtice. Razgovarali smo i o drugim važnim stvarima kojima nas je ovaj film naučio poput:

- drugi i ja (šta nam je svima isto, a šta različito; kako da budemo dobri prijatelji bez obzira na razlike i da druge volimo zbog toga što su darežljivi ili duhoviti, a ne visoki ili mršavi)
- moje slobodno vrijeme (koliko često igramo igrice, čime se bavimo kada nismo u školi, šta je hobi, šta je sve odmor, kako se igramo vani, a kako za kišnih dana)
- ljudi i životinje (šta je empatija, kako razvijamo ljubav prema životnjama, kako pomažemo bespomoćnima, ljubimac nije igračka, ni kod pasa, nije bitna rasa, zašto je pas čovjekov najbolji prijatelj)
- poklonima se u zube ne gleda (šta sve može biti poklon, šta znači da se poklonu ne gleda u zube, je li poklon bolji što je skuplji, može li se pokloniti živo biće, postoje li besplatni pokloni)



## **IGROKAZ „SAMO ZA RĐAVU DECU“:**

*Mustafa, Samuel, Medina, Eldina, Nejra S.*

**AUTOR PRIČE:** Duško Radović

**AUTORI/CE DRAMATIZACIJE:** nastavnica Lamija & co.

**GLAVNI LIK:** dječak Miša

**SPOREDNI LIKOVI:** zec, vjeverica, maca, pčela, riba, medo, mama



**TOK RADNJE:** Dječak Miša je – vrlooo ukratko – mnogo lijen. Ništa mu se ne da i kako kaže pisac – sve ga mrzi. On misli da je jako naporno biti dijete, jer svi od njega nešto traže, a njemu se ništa ne da, zato bi on da bude svašta nešto, samo ne dječak. I tako kreće u potragu za nekim drugim „ja“ (drugim i d e n t i t e t o m – strava teška riječ!). I šta sve pokušava biti:

- htio bi biti zec, ali mora brzo da trči, a to njega *mrzi*
- htio bi biti medo, ali mora zdravo da jede, a to njega *mrzi*
- htio bi biti maca, ali mora se umivati, a to njega *mrzi*
- htio bi biti pčela, ali mora vrijedno da radi, a to njega *mrzi*
- htio bi biti vjeverica, ali mora visoko da skače, a to njega *mrzi*
- htio bi biti riba, ali mora da se kupa i pliva, a to njega *mrzi*

I šta na kraju bude?

E to vam reći nećemo, već potražite negdje knjigu „Samo za rđavu decu“ Duška Radovića i sami saznajte. Ili, smislite svoj kraj!

Svi smo glumili razne uloge – svako je od nas barem jednom bio Miša, a glumili smo i sve ostale životinje. Shvatili smo da nije zabavno biti samo glavni glumac i da su sve uloge podjednako važne!

## PRVAČIĆI, SLOVAČIĆI:

*Nejra H., Medin, Muhamed S. (i drugačica Erna)*

Mi još učimo slova.

**MEDIN:** Ponekad je zabavno, ponekad dosadno.

**NEJRA:** Bezveze je što imam veliku svesku, a ne malu, pa moram više da pišem od Medina i Muhameda.

**MUHAMED:** Ja imam baš dugo ime. Sedam slova! I dva M! A M mi je, na sreću, najlakše slovo.



*m* kao Muhamed, M kao Maca, M kao Mnogo uredan dječak :)

*m* kao Medin, M kao Miš, M kao Mnogo dobar čitač :)

*n* kao Nejra, N kao naočale, N kao Naša najbolja drugarica :)



# ZNANJE JE MOĆ DA UGASIŠ NOĆ:

*Nejra S. i Mustafa*

Najzabavniji časovi su oni kad nastavnica donese laptop i da nam da kuckamo tekstove u programu koji se zove MS Word. Naučili smo sami: upaliti velika slova, preći u novi red, podebljati (bold), nakriviti (kurziv, italic), promjeniti boju u crvenu...

Prvo smo čitali priču i pažljivo je slušali, onda smo sami pravili i kucali kviz! I shvatili da mnogo volimo kvizove. Nismo ga samo napravili i napisali već smo ga na kraju časa i odglumili. Nejra i Mustafa bili su takmičari, a nastavnica voditeljka. I sve smo tačno odgovorili!

Priča koju smo čitali zove se Planeta istine, a napisao ju je italijanski pisac Đani Rodari. Mnogo nam se svidjela, pa je dijelimo sa vama. Ako se i vama svidi, riješite naš kviz da provjerite koliko ste pažljivo čitali! Sretno!

Sljedeća je stranica prepisana iz udžbenika historije koji se upotrebljava u školama na planeti Mun, a govori o velikom učenjaku po imenu Brun (ondje gore sve riječi završavaju na „un”: naprimjer, ne kaže se “mjesec”, već “mjesecun”, ne kaže se “proj”, već “projun”, i tako dalje). Evo:

**Kviz na računaru,  
kviz uživo!**

„Brun, pronalazač, živio je pred dvije hiljade godina, sad spremljen u frižideru, probudit će se za 49.000 stoljeća da opet započne živjeti. Još kao dijete u povojima izumio je stroj za pravljenje duge, koji je funkcionirao pomoću vode i sapuna, no umjesto običnih balona od sapunice, iz njega su izlazile duge svih veličina, a mogle su se protegnuti s jednog kraja neba na drugi, i imale su svakovrsnu primjenu, služile su čak i za vješanje rublja i sušenje. U dječijem vrtiću, igrajući se s dva štapića, izmislio je svrdlo za pravljenje rupa na vodi. Izum su burno pozdravili ribari, koji su se njime zabavljali, kad riba nije grizla. U prvom razredu osnovne škole izumio je: stroj za golicanje krušaka, tavu za prženje leda, vagu za mjerenje oblaka, telefon za razgovor s kamenjem, muzički čekić koji je svirao dok je zabijao čavle i tako dalje.

Previše bi prostora zauzelio, kad bismo htjeli nabrojati sve njegove izume. Navest ćemo samo najčuveniji izum, to jest stroj za laganje koji je funkcionirao na žetone. Za svaki žeton moglo se odslušati četrnaest hiljada laži: one već izrečene, laži koje su ljudi baš u tom času izmislići i sve ostale koje bi kasnije mogle biti izmišljene. Kad bi stroj izrekao sve moguće laži, ljudi su bili prisiljeni da uvijek govore istinu. Zato se planeta Mun zove i Planeta istine.“



# *Nejrin i Mustafin superkviz!*

**1. Kako se zove planeta iz priče?**

- a) Nun
- b) Mun
- c) Tun

**2. Kako se zove izumitelj iz priče?**

- a) Brun
- b) Un
- c) Mun

**3. Na koji slog završavaju riječi na planeti Mun?**

- a) an
- b) in
- c) un

**4. Kako se još naziva planeta Mun?**

- a) planeta laži
- b) planeta istine
- c) planeta mudrosti

**5. Izbaci uljeza:**

- a) stroj za pravljenje duge
- b) telefon za razgovor s kamenjem
- c) kompjuter za mačke

**6. Kako se zove najpoznatiji Brunov izum?**

- a) pernica na baterije
- b) stroj za laži
- c) sveske na baterije

**7. Šta radi čekić iz priče?**

- a) svira
- b) priča
- c) pjeva

**8. Šta se prži u Brunovoj tavi?**

- a) meso
- b) riža
- c) led

**9. Na šta radi stroj za laži?**

- a) novce
- b) žetone
- c) klikere

**10. Šta stanovnici planete Mun govore?**

- a) istinu
- b) laži
- c) pozdrave

# ALISA PADALICA:

Nejra S.



Nejra S. zvana Velika Nejra pokazala je da nije velika samo po tome što je starija i veća od Nejre H. zvane Mala Nejra! Velika je i po tome što bi sve dogovoreno na sastancima redakcije donosila na vrijeme i predavala bez riječi. Uz jednu riječ, doduše: Izvolite. Nejra preda svesku, a u svesci sve kako smo se dogovorili, pa i još više! Nejra je zato dobila počasnu titulu najbolje kvizašice u redakciji, jer je doktorirala na kvizovima. Pogledajte kviz kojeg je Dr. Nejra Velika napravila na priču iz magazina „Kolibrić“ koja se zove Alisa Padalica, a napisao ju je (opet!) čuveni italijanski pisac za djecu Đani Rodari! Prije toga, naravno, pročitajte priču!

Ovo je priča o Alisi Padalici koja je padala uvijek i posvuda. Djed ju je tražio da je odvede u park:

- Alisa, gdje si, Alisa?
- Ovdje sam, djede.
- Gdje, ovdje?
- U budilniku.

Da, otvorila je poklopac budilnika da vidi što je u njemu, pa je svršila među kotačićima i sada je neprestano morala skakati da je ne bi uklijehštila ona mašinerija što se pokretala uz tiktakanje. Jednom ju je djed tražio da joj da doručak:

- Alisa! Gdje si, Alisa?
- Ovdje sam, djede.
- Gdje, ovdje?
- Pa upravo ovdje, u boci. Bila sam žedna i pala sam u bocu.

Teškom je mukom plivala da bi se održala na površini. Sreća što je prošlog ljeta u naučila plivati.

– Čekaj! Sad ču te upecati.

Djed je spustio užicu u bocu, Alisa se uhvatila za nju i spretno se uspentrala. Bila je dobra gimnastičarka. Još je jednom Alisa nestala. Tražio je djed, tražila je baka, tražila je susjeda koja je uvijek dolazila pročitati djedove novine da uštedi četrdeset novčića.

– Jao si ga nama, ako je ne nađemo prije negoli se vrati s posla njeni roditelji! – prestrašeno je mrmljala baka.

– Alisa! Alisa! Gdje si, Alisa?

Ovog puta Alisa se nije javila. Nije se mogla javiti. Radoznalo njuškajući po kuhinji pala je u ladicu s ubrusima i stolnjacima, gdje je i zaspala. Netko je zatvorio ladicu ne primijetivši je. Kad se probudila, Alisa se našla u mruku, ali se nije prestrašila. Jedanput je dospjela u pipu za vodu, a onđe je bilo mnogo mračnije.

“Morat će pripremiti stol za večeru” – razmišljala je Alisa. “Tada će otvoriti ludicu.”

No nitko nije niti pomislio na večeru upravo zato što nisu mogli naći Alisu. Roditelji su joj se vratili s posla i vikali su na djeda i na baku:

- Evo, kako je vi čuvate!
  - Naša djeca nisu padala u pipe za vodu – prosvjeđovali su djed i baka. – U naše su vrijeme padali samo s kreveta i nabijali koju čvorugu na glavi. Konačno je Alisi dozlogrdilo čekanje. Stala je kopati među stolnjacima, doprla do dna ladice, te počela udarati nogom.
  - Bum, bum, bum.
  - Tišina – rekao je otac. – Čujem nekakvu lupu.
  - Bum, bum, bum – zvala je Alisa.
- Kakvih li zagrljaja i poljubaca kad su je našli. A Alisa je odmah iskoristila priliku da padne u džepić tatina kaputa i, prije negoli su je izvukli, stigla je zamazati lice igrajući se hemijskom olovkom.

## Nejrin Superkviz (+bonus zadacić)!

### 1. Kako se zove djevojčica iz ove priče?

- a) Alisa
- b) Lamija
- c) Nejra

### 2. Gdje se prvo djevojčica sakrila?

- a) u ladicu
- b) u budilnik
- c) u ormara



### 3. Ko je najčešće tražio Alisu?

- a) brat
- b) djed
- c) drugarica

### 4. Šta je bilo u ladići u koju se djevojčica Alisa sakrila?

- a) krpe i stolnjaci
- b) ekseri i šarafi
- c) so i biber

### 5. Šta su tata i mama zamjerili dedu i baki?

- a) što gledaju TV
- b) što ne čuvaju dobro Alisu
- c) što jedu slatkiše

### 6. Koji je zvuk čuo tata?

- a) tik tak
- b) bum bum bum
- c) ču-ću



### 7. Šta su svi uradili od sreće?

- a) pali u nesvjest
- b) večerali
- c) zagrlili se

### 8. Gdje je na kraju pala Alisa?

- a) u tatin džep
- b) u šerpu
- c) nigdje

Izbaci uljeza!

Prekrizi mjesto gdje Alisa Padalica nije dospjela u ovoj smiješnoj i zabavnoj pričici!

džep

budilnik

slavina

ladica

čizma

boca

## PRVAČIĆI, MUZEJČIĆI:

*Nejra H., Medin, Muhamed S. (i kustosica Elma)*

Muzej se zove Historijski muzej. U njemu radi teta Elma. Elma je kustosica. Primila nas je u muzejsku biblioteku. Biblioteke imaju i u školama. U ovoj su biblioteci mnogo stare knjige, nismo ih dirali, osim jedne. Ona se zvala Priča o muzejskom kraljevstvu. Čitala nam je kustosica Elma, a mi smo slušali. Muhamed je nacrtao dva rada. Medin je bio malo nemiran. Mene je kustosica Elma pohvalila da sam talentovana za crtanje.

*Nejra H.*



U knjizi imaju princ i princeza. Oni čuvaju muzejsko kraljevstvo i eksponate.

*Medin*

Sjećam se da je u priči u muzeju nestalo struje, a bila je zima. Mi kad smo bili, bilo nam je toplo i bilo je struje! Strašno bi bilo da živimo bez struje.

*Nejra S.*



**Priča o muzejskom kraljevstvu**

Najbolji eksponat kojeg smo vidjeli u obilasku meni je Dama Dinama i peć koja je od lima i mislim da se zove Pećko. U njoj se loži vatra. Svidjela mi se knjiga o muzejskom kraljevstvu jer sve što je u njoj nacrtano možemo vidjeti u muzeju.

Možda i ne bi, da imamo Pećka i druge peći na vatru.

*Muhamed S.*



## PRVAČIĆI, NEUSTRAŠČIĆI:

*Nejra H., Medin, Muhamed S. (i drugačić Eldin)*



Naši prvačići i uljez drugačić pravi su neustrašći jer se ne boje duhova, jer znaju da oni ne postoje (Muhamed je siguran u to) ili ako postoje, žive daleko u pećinama (tako kategorično tvrdi Medin!) ili na selu, nipošto ne u gradu (kune se Eldin). No, žive još negdje: u knjizi Dubravke Ugrešić: Kućni duhovi. Ili, kako joj tepa Eldin: Dućni kuhovi! E, u toj knjizi pronašli smo čak dvadeset i sedam duhova i izdvojili nama najdraže. Upoznajte ih i vi!

Eldinovi i Medinovi omiljeni kućni duhovi su  
**ČURLICI**

Zašto?

Zato što su ovo kućni duhovi koji su jako muzikalni, a i naši momci vole muzike. Samo, oni su čuli za razne muzičke instrumente, od klavira do violine, ali nikad nisu čuli da neko, poput Čurlika, svira u tjesteninu! Da, da – evo kako piše u knjizi: Čurlici sviraju noću: duvaju u makarone i pužiće od tijesta, a tanke rezance koriste kao harfu. Priča se da onaj ko jednom čuje njihovu muziku, nikada je ne zaboravlja! Eldin i Medin voljeli bi noću čuti kako zvuči muzika iz makarona i ne bi se uplašili, već nasmijali!

Nejrini omiljeni kućni duhovi su  
**BEBREBI**

Zašto?

Zato što liče na mekane pufnice ili kako ih je spisateljica opisala: Neki poznavaoči kućnih duhova tvrde da Bebrebi liči na mekanu, nakostrešenu, kao perce lagana pufnu koja se kotrlja i valjuška, skupljajući usput svojim dugim svilenkastim dlakama sitno smeće. Ovi kućni duhovi nisu zločasti, mada su kradljivci, no, stvarčice koje oni kradu i skrivaju po kući nemaju nikakvu vrijednost, oni gomilaju i sklanjaju razne gluposti od karti za autobus, preko peruškica iz jastuka do mrvica hljeba (a usput i stalno zaboravljaju gdje su šta posijali) i zato su Nejri mnogo simpatični. Voljela bi čak i da ih nekad sretne u svojoj sobi, veli da se ne bi prepala, već obradovala!

Muhamedovi omiljeni kućni duhovi su  
**DORSENI**

Zašto?


Zato što se po cijele dane oni golicaju i smiju, a i Muhamed voli da se smije. I zato što su smiješni jer imaju samo dva prsta: palac i dugački kažprst s kandžicom za golicanje. Dorseni ne golicaju samo jedni druge, a najgolicljiviji su iza uha (Muhamed ispod pazuha – probali smo, kako se smije!), već golicaju i stvari i predmete oko sebe: golicaju jabuke pa se one prospu iz zdjele, golicaju supu pa ona iskiši iz šerpe, riža se prospe od smijeha, a mlijeko se prolje iz šolje!

## OD ČITANJA SE RASTE:

*Eldina i. Mohamed*

Priče se ne moraju samo čitati, mogu se i slušati. Slušali smo jednu audio priču koja se zove „Od čitanja se rate“. Napisala ju je Jasminka Petrović i govori o djevojčici Tamari koja nikako, baš nikako nije htjela da uči slova, a mama ju je tjerala. Naučila je čitati uz pomoć jednog djeda i kompjutera.

Predlažemo vam da je preslušate ovdje\*:



A onda da, nakon slušanja, napišete po tri razloga zašto je bolje kad čitamo sami, a zašto kad slušamo audio knjige ili radio drame:

ZA ČITANJE KNJIGE:

1. \_\_\_\_\_
2. \_\_\_\_\_
3. \_\_\_\_\_

ZA SLUŠANJE KNJIGE:

- \_\_\_\_\_
- \_\_\_\_\_
- \_\_\_\_\_

\* <http://www.rts.rs/page/radio/sr/story/23/radio-beograd-1/3073565/dramski-program-za-decu-jasminka-petrovic-od-citanja-se-raste-premijera.html>

## ČITANJE ĆIRILICE, NEUMORNE KNJIŽEVNICE: *Nejra, Eldina i Medina*

Vježbate li vi čitanje čirilice? Mi smo to radili s Klaudijom. Čitali smo tekst bh. književnica Feride Duraković, koji ima naslov samo po slovu ЛЛЛ ЉЉ или čirilično ЛПЛ ллл. Malo smo se iskreno i napatili s tim čitanjem. Na kraju nam je Klaudija još jednom pročitala tekst. Svidio nam se ovaj fazon pa smo i mi napisali jednu priču. Pokušali smo u nju staviti što više riječi koje počinju sa slovom N. Vidi se da je Nejra izabrala slovo, zar ne?

### ПРИЧА НА СЛОВО Н

Hoć je bila nemirna. Нана је залијевала невен у својој башти. Наишле су комшинице Наида, Нафа и Нисрин. Несташно и наивно су се смијале. Нана им је показала ново цвијеће у башти – нарцис. Оне га никад нису видјеле дотад. Нови цвијет их је обрадовао. Наида је питала нану може ли га убрати. Нана није дала. Рекла је Наиди да га може помирисати. Добро је користити носове да би миризали цвјетове.



## VJEŽBA PISANJA ĆIRILICE, BAJKOPISANJE: *Eldina i Samuel*

Klaudija je htjela da vidi kako mi pišemo čirilicu. Svima nam čirilica malo teže ide. Eldina i Samuel zajedno su smislijali bajku. Iako su je sporije pisali na čirilici, nama se ona sviđa. Posebno su nam super imena likova

### ЧАРОБНИ ВОЗ

Eldija Једнога дана у воз су ушла дјеца: Елдина, Клаудија, Ламија и Сами. Био је то посебан, чаробни воз, направљен од чоколаде и ванилије. Прозори су се могли јести. Сами је волио да једе прозоре од чоколаде. Његова сестра Ламија хтјела је да проба да вози воз. Елдина је плесала у ходнику, а Клаудија је изводила балет за цвијеће које је расло у возу. Брзо им је досадило да се играју сами па су одлучили да се играју жмире. Елдина, Ламија, Клаудија и Сами су схватили да им је најљепше када су скупа и да је пријатељство најбоља чаролија.



# PRIDJEVI I MI, BIOGRAFIJE U AKROSTIHOVIMA:

*Medina*

(11 godina) | OŠ Silvije Strahimir Kranjčević, IV. 1

Pridjevi se mogu vježbati i na ljudima. S Klaudijom smo vježbali da razmišljamo o sebi na lijep način. Imali smo zadatak da smislimo fin pridjev za svako slovo u našem imenu. Trick je bio u tome da ti pridjevi trebaju opisivati naše dobre osobine. Naučili smo i šta su to akrostihovi: pjesma u kojoj početna slova stihova kriju neku riječ ili poruku. Eto, tako su nastale naše fine biografije u akrostihovima! Nije teško, pokušaj i Ti!

Marljiva Medina

Ekstra je matematičarka

Dобра је drugarica

I ljubavi za svakog ima

Nepobjediva je u rolanju

A o repanju da ne govorimo.



## **GLEDANJE FILMA JE UVIJEK BOLJE U DRUŠTVU:**

*Eldina, Samuel, Jasmin, Eldin, Nejra, Mustafa i Medina*

U sobi na četvrtom spratu Doma imali smo jedan dan projekciju filma. Klaudija je donijela svoj laptop. Mi smo se tome baš obradovali. Nećemo vam ovdje prepričati radnju filma, nego pročitajte zašto Nejra, Mustafa i Medina misle da je dobro pogledati ovaj crtani film:

### **DESET RAZLOGA DA POGLEDATE FILM WALL-E:**

1. Zato što se radnja događa u svemiru
2. Zato što su glavni likovi super
3. Wall-E je stari robot, dobrodušan je i čisti Zemlju od smeća
4. Eva je moderan i lijep robot i ima super moći
5. U filmu ima ljubavi – pa možete naučiti zašto je ona važna u životu
6. Film nam pokazuje zašto trebamo bacati smeće u kante, a ne u prirodu
7. Film nas uči da ne treba odustajati od dobrih stvari – ljubavi, čiste planete...
8. Isto da nije greška pogriješiti, greška je ne ispraviti grešku
9. Zato što ima sretan kraj
10. Uz svaki film možete napraviti kokice :)

Nadamo se da ćete uživati! :)



# VJEŽBA I ZABAVA – VELIKO DAAA ZA UKRŠTENICE:

*Samuel, Jasmin i Nejra*

Prvo smo vježbali prepoznavanje imenica i glagola. Dobro nam je išlo. Onda nam je Klaudija dala jednu križaljku da ispunjavamo. Nama je to bilo super zabavno. Kada nas je Klaudija pitala želimo li naučiti praviti križaljke sami, svi smo rekli: DAAAAAA. Prvo smo sastavili križaljku za proljeće... a onda brzo i za ljeto, jesen i zimu. Ako i Ti voliš ukrštenice u osam smjerova – one se zovu osmosmjerke – ovo su stranice u našem časopisu baš za tebe. Svaka ukrštenica krije poruku – otkrij je!

## ZIMA

Č	I	Z	M	E	I	S	P
S	N	I	J	E	G	A	A
Z	Š	I	M	R	L	NJ	H
A	J	A	U	E	U	K	U
C	O	D	L	E	D	E	U
O	V	L	A	P	A	K	I
E	S	NJ	E	Š	K	O	C
S	K	I	J	A	NJ	E	E

čizme, grudve, iglu, kapa, led, pahuljice, sanjke,  
skijanje, snijeg, snješko, šal

## PROLJEĆE

C	V	I	J	E	Ć	E	J
S	U	N	C	E	Z	A	A
R	O	D	A	E	G	L	K
A	P	R	L	O	O	A	N
H	U	E	D	E	Ć	S	I
E	N	A	E	J	E	T	C
B	S	U	P	E	R	E	A
A	C	I	Č	I	B	U	U

cvijeće, sunce, jaknica, ljubičica, zelen, behar  
roda, jagoda, laste



## LJETO

V	S	I	Ć	I	Š	I	M
R	U	U	K	I	L	E	O
U	N	R	U	V	A	T	R
Ć	C	I	P	O	U	O	E
I	E	K	A	L	F	J	M
N	E	Š	Ć	A	L	I	E
A	J	E	I	V	E	P	R
P	A	P	U	Č	E	O	K

vrućina, mišići, šlauf, more, kreme, papuče  
valovi, peškir, sunce, kupači

## JESEN

L	I	Š	Ć	E	Š	I	K
O	M	E	D	O	I	V	A
K	B	O	G	A	Š	J	B
V	T	E	J	P	A	E	A
E	M	Z	I	Č	R	T	N
Ž	U	T	A	E	I	A	I
E	S	E	N	L	K	R	C
P	T	I	C	E	E	I	A

lišće, kiše, lokve, čizme, kabanica, ptice  
medo, vjetar, pčele, šišarike, žuta

## **SUPER DJEVOJČICE, DJEVOJKЕ I ŽENE, NAŠE SPISATELJICE:**

*Medina i Nejra*

Klaudija je donijela jednu svoju knjigu na čas. Ona se zove Priče za laku noć za mlađe buntovnici i govori o nekim super djevojčicama, djevojkama i ženama. Ove priče dosta liče na bajke, a ipak to nisu. Govore o stvarnim ljudima pa su to zapravo i biografije. Mi smo kratko prelistali sve njih. I pročitali jednu o super balerini. Malo joj je ime neobično jer dolazi iz Portugala. Jeste vi čuli za Aliciju Alonso? Lako je bila slijepa, postala je super poznata balerina u cijelom svijetu. Bila je baš uporna. Kad smo čuli priču o balerini, Klaudija nas je pitala šta je super raditi u životu... Mi smo rekli da je super pomagati drugima. Onda smo došli na ideju da napišemo bajku. Prvo smo htjele da nam princeza bude frizerka. Onda smo se predomislile. Čime se bavi naša glavna junakinja u priči, pročitajte sami

### **NAŠA BAJKA**

Bila je jednom jedna djevojčica i zvala se Nur. Imala je mlađu sestru Eminu koja je imala samo tri godine pa se Nur često brinula o njoj.

Jednog dana njih dvije su se igrale u parku. Dok se Nur igrala s prijateljicama, naišla je Eminina prijateljica Sara. Emina ju je vidjela i potrčala prema njoj. Tako je Nur izgubila sestruru. Čekala ju je cijeli dan u parku da se vrati. Navečer je naišla jedna baka i slučajno vidjela usamljenu djevojčicu. Povela ju je sa sobom. Nahranila ju je, okupala i obukla. Djevojčica Emina je ostala kod dobre bake koja se zvala Azra. Kad je porasla, odlučila je da bude medicinska sestra. Od bake je naučila da liječi, presvlači i pomaže bolesnima. Jednog dana se Nur prehladila i došla je u dom zdravlja gdje je Emina radila. Sestre su se odmah prepoznale. Zagrlile su se jako. Emina je dala Nur lijekove i ona je brzo ozdravila.

Emina se s Nur vratila kući. Roditelji su bili presretni. Zahvalili su se baki Azri jer je čuvala Eminu i pozvali je da živi s njima. Svi su zajedno živjeli dugo i sretno.



# **MALO KINO NA OTVORENOM, VJERNA PUBLIKA:**

*Nejra, Medina, Eldina i Mustafa*

Bilo je dosta vruće pa su Lamija i Klaudija rekle da ćemo taj dan časove imati u dvorištu. Na Lamijinom laptopu smo gledali crtani film Knjigoboti. Bilo je to malo kino na otvorenom, a umjesto kokica imali smo bombone. Mislim da bi se i vama ovaj crtani svidio. U njemu djeca i pas pobjeđuju zločestog voditelja, a to su uspjeli tek kad su naučili šta su to imenice, a šta pridjevi.

Da bismo i mi ponovili ono šta smo iz crtanog naučili o imenicama i pridjevima, pričali smo o ljetu i svakoj ljetnoj imenici pridodali pridjev.

UKUSAN sladoled

PLAVO more

PJEŠČANA plaža

ŠARENI suncobran

SIVE papuče

VRUĆE Sunce

VELIKI brod

PLAVI delfin

PLASTIČNA kantica

CRVENA lopatica

KRATKI raspust

OKRUGLI šlauf

STRAŠNA ajkula

Ljeto je i više od ovog našeg popisa. Ako misliš da smo neke važne pridjeve i imenice preskočili, ima prostora i za Tebe. Nastavi listu :)

---

---

---

---

---




---

---



---



IME	GODINE	RAZRED	3 SUPER STVARI
Medina	12	4.	<ul style="list-style-type: none"> <li>- Voli da rola i pliva</li> <li>- Voli da putuje</li> <li>- Odlično repuje</li> </ul>
Samuel	8	3.	<ul style="list-style-type: none"> <li>- Voli da sluša Vuka</li> <li>- Odličan je fudbaler</li> <li>- Voli dobivati petice u školi</li> </ul>
Nejra S.	11	4.	<ul style="list-style-type: none"> <li>- Voli da sluša rep</li> <li>- Voli sport, posebno gimnastiku</li> <li>- Super pliva</li> </ul>
Mustafa	10	4.	<ul style="list-style-type: none"> <li>- Voli se šaliti s Medinom</li> <li>- Najdraži grad na svijetu mu je Milano</li> <li>- Voli da igra žmire</li> </ul>




IME	GODINE	RAZRED	3 SUPER STVARI
Nejra H.	7	1.	<ul style="list-style-type: none"> <li>- Voli učiti bosanski</li> <li>- Voli pomagati vaspitačima oko slaganja školskih ormara</li> <li>- Najviše voli proslave rođendana</li> </ul>
Eldin	8	2.	<ul style="list-style-type: none"> <li>- Odličan je golman</li> <li>- Hrani se zdravo – samo meso i povrće</li> <li>- Crta drvenim i vodenim bojicama</li> </ul>
Šemsa	12	3.	<ul style="list-style-type: none"> <li>- Voli iznenadenja</li> <li>- Dobro vozi bicikl</li> <li>- Voli konje i želi naučiti jahati</li> </ul>
Renato	14	7.	<ul style="list-style-type: none"> <li>- Voli gledati i igrati fudbal</li> <li>- Vozanje bajka</li> <li>- Priključuje računare</li> </ul>



IME	GODINE	RAZRED	3 SUPER STVARI
Eldina	10	3.	<ul style="list-style-type: none"> <li>- Zna dobro crtati</li> <li>- Zna napraviti zvijezdu</li> <li>- Odlično piše i čirilicu i latinicu</li> </ul>
Muhamed	7	1.	<ul style="list-style-type: none"> <li>- Voli petice iz kontrolnog</li> <li>- Brzo trči i daleko skače</li> <li>- Najbolje se vrti i nikad mu se ne zamanta</li> </ul>
Erna	8	2.	<ul style="list-style-type: none"> <li>- Najbolje na svijetu vozi bicikl (bez pomoćnih!)</li> <li>- Voli odbojku</li> <li>- Zna da repuje</li> </ul>
Medin	7	1.	<ul style="list-style-type: none"> <li>- Dobar u sakrivanju, ganji i žmirovanji</li> <li>- Dobar u matematici</li> <li>- Brzo jede kolače</li> </ul>



IME	GODINE	RAZRED	3 SUPER STVARI
Jasmin	10	3.	<ul style="list-style-type: none"> <li>- Super fudbaler</li> <li>- Odlično piše pisana slova</li> <li>- Brzo smaže sladoled</li> </ul>
Muhamed	12	5.	<ul style="list-style-type: none"> <li>- Dobar je košarkaš</li> <li>- Želi biti električar</li> <li>- Rado pomaže čistiti u domu</li> </ul>
Munever	15	6.	<ul style="list-style-type: none"> <li>- Dobro dribla</li> <li>- Brzo, ali baš brzo priča</li> <li>- Pravi dobre frizure</li> </ul>
Zaim	12	5.	<ul style="list-style-type: none"> <li>- Dobar matematičar</li> <li>- Odličan drug</li> <li>- Bolji košarkaš od starijeg brata</li> </ul>



# RJEŠENJA:

## **NEJRIN I MUSTAFIN SUPERKVIZ:**

TAČNI ODGOVORI: 1B, 2A, 3C, 4B, 5C, 6B, 7A, 8C, 9B, 10A

## **NEJRIN SUPERKVIZ:**

TAČNI ODGOVORI: 1A, 2B, 3B, 4A, 5B, 6B, 7C, 8A

### **ZIMA**

SKRIVENA PORUKA:  
ZIMA JE COOL

### **PROLJEĆE**

SKRIVENA PORUKA:  
PROLJEĆE JE SUPER

### **LJETO**

SKRIVENA PORUKA:  
LJETO JE LIJEPO

### **JESEN**

SKRIVENA PORUKA:  
BOGATE JESENI

**Ovaj mali magazin napravila je vesela ekipa iz Doma Bjelave, uz malu pomoć njihovih velikih drugarica Lamije Begagić i Klaudije Mlakić Vuković. YoYo želi doći do što većeg broja čitateljica i čitatelja. Kada završite čitanje, proslijedite YoYo nekom drugom i recite njemu ili njoj da učini isto.**

